



Bentiaraq Ottosen

UPA 2026/137-1

Atassut

29. April 2026

**Atorfimmi peqquserlunnerup akiornissaanut Naalagaaffiit Peqatigiit
isumaqatigiissutaannut Kalaallit Nunaata ilanngunneqarnissaanik matumalu
aalajangiiffigisassatut siunnersuutip akuerineqarnerata kingunitsianngua tamatuma
sulissutigineqalernissaa aallartinneqaqqullugu Naalakkersuisut peqquneqarnissaanik
Inatsisartut aalajangiiffigisassaattut siunnersuut.**

(Inatsisartunut ilaasortaq Pipaluk Lyngø, Inuit Ataqtigiit)

Atassummiit qutsavigerusupparput inatsisartunut ilaasortaq Pipaluk Lyngø siunnersuuteqarmat inuiaqatigiinni oqallisigisariaqakkatsinnik pingaaruteqartumik.

Pisortat ingerlatsineranni peqquserluttuliornerup akiorneqarnissaa ammasumillu ingerlatsinissaq pingaaruteqarluinnarput, tassami tamat oqartussaaqataanerannut nukittorsaassagaanni pingaartuummat innuttaasut tatiginninnerisa tigummiinnarnissaannut inuiaqatigiit suliffeqarfiutaasa ammasuunissaat.

Atassummiilli isumaqarpugut Nunarput inatsiseqareertoq peqquserluttuliorortoqarsinnaaneranut Nunatsinnut illersuutaasussanik aammalu kinguneqartitsissutaasinnaasunik. Soorlu pinerluttulerinermut inatsit, pisortat ingerlatsinerat pillugu inatsisit aammalu inuussutissarsiornermut atatillugu malittarisassat, ullumikkut periarfissaapput peqquserluttuliornerup pinaveersaartinnissaanut.

Taamaammat Atassummiit isumaqarpugut United Nations Convention against Corruption-imut ilanngunneq takussutissatut isumaqartoq taamaattorli allaffissornerulernermik kinguneqassasoq.

Saniatigut ernummatigineqartumik paasinnippugut, inuiaqatigiit akornaninngaanniit ingammik Nunatta pisuussutaanik atornerluisoqarsinnaaneranut tunngatillugu nunanit allaneersuniit. Ulluni qanittuni pisut takutikkaat soorlu ersarissumik pisariaqartitsisoqaraluartoq innuttaasunut paasissutissiisoqarnissaa.

Atassummiit pingaartipparput qulakkiissallugu ullumikkut inatsisit atuuttut naleqqunnersut nalilersorneqarnissaat, pisariaqartitsisoqarnerorlu allanik ilassuteqartoqarnissaanik.

Tamakkua tunngavilersuutigaluguit Atassummiit Naalakkersuisut allannguutissatut siunnersuutaat:

“Kalaallit Nunaanni inatsisitigut atuutsitsineq atorfimmi peqquserlunnerup akiornissaanut Naalagaaffiit Peqatigiit isumaqatigiissutaannut ullumikkut naleqqunnersoq Naalakkersuisunit misissorneqarnissaa”



Isumaqarpugullu tamanna aqqutissaasoq eqqortumik oqimaaqatigiissaarinissamut, tassa Nunatta nammineerluni aqqissuussinera ataqqillugu, aammalu innuttaasut tatiginninnerisa nukittorsarnissaat qulakkeerlugu.

Qujanaq.